

續行水金鑑

續行水金鑑卷第八十六

運河水 章牘十四

乾隆十四年三月二十一日

上諭軍機大臣等蘊著高斌張師載等會奏江南徐州衛江北幫並長淮衛幫漕船起運一摺甚不明晰河道建立壩工或用以減黃或用以濟運所期河漕兩有裨益至漕艘之出入亦當首先籌及以免臨期搬卸之煩若今所奏則高斌從前設臨黃臨運兩壩修築本意將以減黃乎抑以濟運乎是並未始終籌及不過一時創舉新工以圖開銷帑項博屬員之虛譽耳且建立緣由究於何處有益摺內既未詳悉聲敘而自築壩以後累

年該幫重運既稱屢經停減何以又有回空船隻仍由會口歸次是所稱兩壩遞互啟閉俱屬空言轉須酌給飯銀以資轉口而支河則聽其淤塞臨事又須挑挖若謂經涉黃河二百餘里風波難測則各省重運亦有經由黃河者何獨於徐淮兩幫則以重載涉險爲慮且一隄之隔舟行紆回曲折至二百餘里米擔又須盤卸一卸一裝俱資人力徒滋耗折偷漏諸弊既勞且費殊非永遠可循之道其運丁既有行月口糧自南而北長途歷數千里之遠乃因轉口多行二百餘里卽與加給飯食亦無此體制事雖微小而措置實爲迂謬高斌原本糊塗益以蘊著之器量褊淺張師載之硜硜自守於河



防運道經久之計均屬茫然是以三人奏摺如此含糊著傳旨申飭其兩幫出入運道及轉口經由河路並兩壩現在是否有資啟閉及從前兩壩修築有無裨益之處著江南總督黃廷桂親往會同高斌等閱勘明確繪圖貼說詳晰具奏嗣後此兩幫漕船如何入運方爲妥協著另行定議請旨今既如此料理俟查明後所有不應准銷之項著落高斌蘊著張師載賠補

皇帝聖訓純

五月十七日工部議得高斌等奏臣高斌顧琮準泰欽遵於初十日會同前至東平州戴村壩詳加履勘悉心妥議查該壩南北通長一百二十六丈八尺北爲玲瓏長五十五丈五尺高七尺中爲亂石長四十

九丈一尺高六尺二寸南爲滾水長二十二丈二尺高五尺查運道閘河惟賴汶水濟運現在汶河水面較滾壩尙低二尺五寸本年並未過水今運河閘水充裕重運遄行浮送有餘是汶水若再加長至二尺五寸以上則係運河多餘之水是以前議酌將玲瓏壩落低一尺五寸亂石壩落低七寸均較滾水壩尙高五寸以便稍減閘河盛漲及汶濟一帶水患實無妨於漕運也臣等復公同斟酌前議請將玲瓏亂石壩落低者所以減洩多餘之水俾上游少免壅溢填塞水孔接砌跌水坡石者所以珍惜濟運有用之水使涓滴不致滲漏又因壩下六十里卽東平州城每

遇水發城河屯土防護田地屢遭水患並請議挑引
河俾直趨西北以避州城又築護城護田民堰等工
以防汶河伏秋盛漲今臣等周歷履勘前項各工業
經部議覆准現已工竣八九與舊日受患情形迥異
將來卽遇伏秋河水盛漲東平已屬修防有備所有
玲瓏亂石二壩落低尺寸及填塞水孔接砌坡水等
工原估銀五千二百七十餘兩請仍照前議辦理再
現今汶河水勢河溜下移逼近滾壩之下原屬河底
滲漏涓涓細流未斷殊非珍惜涓滴遏汶濟運之本
意今酌議應用膠土自壩上水邊下戩填塞結實再
加夯礮以資堵閉約估土方銀五百餘兩照例一并
行委員辦料於本年霜降後秋冬水涸儻修完工應
如所奏奉

旨依議

運河
道冊

是月河督高斌議以戴村玲瓏壩走洩濟運之水於
玲瓏壩兩頭各留五丈中間三十九丈落低七寸爲

節宣之道

今仍按此係高斌查勘會議之案奉
旨仍著高斌前往山東會同總河巡撫詳

勘奏明
辦理

按戴村三壩卽元人堽城壩六斗門馬之貞

築沙堰之法而變通其用也自何國宗於三壩內增
築石壩一道涓滴不行無隙通沙田文鏡拆建石壩
卽以所拆石料改建磯心五六十座中留水竇安設

閘板當時卽不能啟閉另築土隄名春秋壩嗣又於中間迎溜處用灰石填塞兩頭各留八洞下板攔束春秋壩悉行起除至是以玲瓏壩洩水過多更爲定議明時宋尙書築壩於戴村遏汶流而留坎河口下壩以備分洩入海其時坎河止用沙壩水漲衝沙而去嗣因松山一帶沙淤河身移近汶流直灌坎河口萬恭始疊石爲灘潘宮保更築石壩用丈許大石夾砌如墉實細石其中塗以堊上銳下豐水高漫壩西出水卑順流南下漕不溢不涸舒應龍又於兩旁各築石堰以防衝刷因時異建罔弗咸宜余毅中以易土壩爲石灘有隙可以洩水無路可以通沙張文奇

亦言石灘阻塞不洩旁潰於王堂諸口及草橋上下灘能走水不能走沙沙與河平反足爲障與馬之貞沙與壩平之說相同河勢隨時變易沙淤河高水更猛厲以土爲壩疏而且潰若壩不能禦全河漫衍而西南旺以北舟膠不行東原膏壤化爲沮洳亦應稍爲變通昔費宏議建八閘與今制約畧相同今之戴村立壩猶元人之有事堽城也分水在濟故遏汶入洸會沂泗以出天井宋禮移分水於南旺則遏汶之功全在戴村今爲玲瓏壩兩頭洩水走沙落低中間十餘年後伏秋盛漲過水丈有五尺坍塌壩身八十餘丈不免衝蕩蓋變通古人之法而不沒其意順之

入海以暢其勢蓄之入湖以納其流壩不至衝漕亦
無害始爲得之

河渠
紀聞

八月十九日

上諭內閣軍機大臣等會同該部議覆黃廷桂會勘臨
黃臨運二壩一摺朕已降旨依議黃廷桂應照駁查事
例悉心查明據實覆奏至此事朕按圖詳察始末情形
總由從前高斌辦理錯誤姑無論前明卽自本朝建築
竹絡壩以來淮徐糧道通行已久自添築二壩而竹絡
壩轉成無用究之竹絡一壩實已足資宣洩無庸添設
幸而六年以後連年截漕兩幫未經出運是以其弊未
顯遷延至今設使六七兩年卽行重運亦斷不能如高

斌所奏隨機啟閉從壩口入運矣至此時始云今非昔
比其不能掩飾已可概見前此河溜通行可引以濟運
可藉以刷沙所以數十年無礙今忽添此二壩阻滯過
甚河底日積河身日高黃水之高於清水五尺有餘其
明驗也不特高斌之說不可行卽黃廷桂由竹絡壩入
蘇家閘之議亦不可行其意在使河身紆曲而不知黃
流不利於紆曲紆曲則益加淤滯其失亦畧相等但高
斌已誤於前此時卽追咎其既往亦無補於將來自應
籌善後之策以爲補偏救弊之法著傳諭黃廷桂悉心
籌度或遇截漕之時將淮徐兩幫船隻多爲截留或仍
令其由楊家莊入運此二幫本由黃河順流而下所增

程途無幾酌量稍加工費似無不可務期熟籌妥協毋稍存調停遷就之見方爲永遠可行軍機處所奏說帖著一并封交黃廷桂令其遵旨查明妥議另行奏聞

帝純皇
聖訓

九月黃廷桂奏接准部咨交臣將臨黃臨運二壩果否有益並淮徐兩幫糧船從前果否俱由竹絡壩入運及將來如何入運方爲妥協一并詳議覆奏到日再議又接大學士公傅恒字寄

上諭

前已恭載

欽此臣跪讀之下感悚交并隨於八月二十五日自江寧起程九月初四日行抵二壩因河工事務向非總督衙門經管案卷不全隨弔舊卷詳考原

委又詢之士著耆民年老河兵人等博採輿論熟察情形敬爲我

皇上備悉陳之查竹絡壩支河係康熙二十八年河臣王新命於支河內用竹篾裝石疊砌成壩名曰竹絡以束水勢清弱引黃以濟不足黃盛分黃以洩有餘制度誠爲盡善至徐屬漕船向由徐州鎮口閘歷榮城達夏鎮入運自二十八年中河挑後鎮口閘故道淤塞徐淮二幫漕船於徐州水次受兌卽由黃河至竹絡壩入運數十年來通行無滯是竹絡一壩乃黃運兩河之關鍵或以濟運或以洩黃互相資藉而且徐淮漕艘商民船隻並得就近由此出入以省繞

道轉口之煩原有裨益迨乾隆六年河臣高斌以黃水常流恐其衝嚙隄岸遂有建築臨黃臨運二壩之舉築後連年堵閉水爲壩遏不能通暢沙停淤積上下閉塞涓滴不流誠如下

聖諭自添築二壩而竹絡壩轉成無用今春重運難行弊實由此臣前次會勘時據高斌云壩外淤灘只須畧加挑浚開復甚易是以會同覆奏今臣連日親至河干察訪該處老民咸稱從前黃河大溜自宿遷由西向東直注於城西稍北馬陵山腳之下水被山阻溜勢向東而西引入竹絡壩以濟運故名倒鉤河距竹絡壩一千五六百丈勢遠溜緩徐徐內注有益無

害是以水流無淤而大溜亦不至衝擊爲患自臨黃壩門堵閉而壩外嫩硬淤灘普遍長平不特當日倒鉤河身蹤跡莫求卽馬陵山下回水僅存微形與昔迥異勢難復舊高斌不得不於臨黃壩對面就近開挑支河一道接引漫水以爲回空糧船之路但去竹絡僅止四百餘丈其地甚近黃河高於運河五尺有餘現在進口漫水因高而下此時空船回次尙可乘勢行走其實該處暗灘仍在水底並未挖通冬後水落灘現淤滯如故蓋硬灘尙可挑挖而嫩灘非人力可施明春黃水落時有灘格礙水難越灘而上兩幫重船安能挽運重載旣不能行一至伏秋汛水陡漲

泛濫於漫灘之上奔騰而入轉有衝擊運河之患則現今所挑支河無益有害臣已檄飭淮徐河道德倫俟兩幫空船由此歸渡後卽行堵塞並咨明河臣衙門知照是臨黃臨運二壩之設實屬錯誤今竹絡壩支河徒存故跡倒鉤河已斷不可開所有徐淮兩幫漕船自應欽遵

諭旨嗣後如遇截留卽多爲停截如起運之年卽遵旨由楊家莊轉口入運實可永遠行走查徐淮兩幫漕船仰蒙

皇上加賞工費臣查兩幫船隻由黃河而至楊家莊轉口入運計多程站八日今春蘊著每船給銀八兩實

屬過多臣謹擬每船酌給銀四兩以爲會口一帶雇覓夫工挽絳之需卽在糧道餘平銀內支給無庸請動正項但臣初辦河務前因高斌久歷河工其建設兩壩似必有所見臣未能深悉遽行會奏咎固難辭今旣勘明二壩無益何敢回護原奏所有建築二壩及歷次啟閉共用過工料銀一萬一百六十七兩六錢係不應准銷之項應於高斌名下著落賠還再臣更有請者中河運道本乏來源春間駱馬湖乾涸無水惟藉東省上閘河水以濟運行儻上流水小則引黃水接濟雖連年運河水勢充裕無需挹注但竹絡壩支河旣已斷流偶值上游雨雪稀少清水微弱作

何濟運黃河或遇異漲將竹絡壩作何堵防統聽河臣臨時就近相機辦理奉

硃批著高斌明白回奏該部知道

南河成案

是年高斌奏兩壩遞互啟閉支河灌塘之水一洩無餘重船出壩不及勢必膠擱從前草率奏請試行辦理錯誤所有建築兩壩及歷次堵閉所用工料銀一萬一百餘兩情甘賠補經部覆准

河渠紀聞

是年東省大浚運河顧琮奏改泗河董家口壩爲滾水壩減洩漫水疏入白馬湖南通貫家灣爲新泗河又開支河自貫家灣達魯橋入運按泗水由陪尾挾山溪溝泉諸水直瀉百里夏秋泛漲潰岸飄沙民

田遭淹兗東設閘二一曰金口卽隋文帝時薛胄於沂泗之交積石爲堰決令西注坡澤以溉良田者經泗河適中之所地勢最高每逢水漲下游宣洩爲難沂河亦於此會入泗強沂弱卽致泛溢淹浸民田設閘以箝束暴流閘門五其北一閘曰黑風閘門二至秋冬水涸始閉金口導水入黑風口西流府河至馬場湖收蓄顧琮以泗河下流董家口頻年被刷改建滾水壩減洩漫水卽由新衝河形疏入白馬湖再於白馬湖淺窄之處疏入貫家灣使歸獨山湖復闢支河自貫家灣西達魯橋入運泗河盛漲之水分流入白馬湖則魯橋之下流不壅闢支河由貫家灣入魯

橋歸運則白馬湖不溢而魚臺徐沛無泛浸之苦法之善者後復以董家壩壩基過高盛漲宣洩不及將壩底展寬落低并浚孟家橋馬坡暢入尾閘水小之年卽於孟家橋築堰攔截使由興隆橋入運寧陽石梁口汶水漫堰入洸至濟寧城北頂阻府河之水亦多旁溢相機堵築使汶不入洸新泗河分道入運又堵截入洸之汶運東濟北無漂沙礮石之憂而漕運

亦安流矣

河渠紀聞

乾隆十五年四月十六日

上諭軍機大臣等河道總督高斌回奏部駁臨黃臨運兩壩情形一摺部議以黃高清下勢難倒注高斌則稱

續行水金鑑卷八十六

運河水十

黃河水面高於運河五尺設遇大汛運河水面加長七八尺至丈餘黃河偶未加長或雖長而較小於運則清水之下者轉高下游中河難以容受卽可啟放二壩引清入黃等語夫黃河水面高於運河五尺非獨水面高乃其河底高也黃運河底既高下相懸卽使運河盛漲非橫決旁衝卽下流漫溢成災何能使之轉而就高此理易曉非秘鑰難明之事而高斌仍復如此執奏不過回護前言此摺朕已批令原議之大臣議奏今思事既不行若該部立議駁詰徒多往返終無了局若含混定議將謂河務中至淺近之理竟不能知亦非政體是以特行傳諭令其知悉以全顏面此摺不必交議一并諭

令知之皇帝聖訓純

是月高斌進河工圖說二十條隸運河者九條禹
王臺山東鄒城縣城北禹王臺傳爲大禹遺蹟康
熙二十八年前河臣王新命建竹絡石壩約攔水勢
該工雖隸山東實則關係江南利病嗣是南省下游
數十年得以奠安又經前河臣陳鵬年齊蘇勒先後
增設隄堰雍正八年山水驟發舊壩衝潰水勢下注
越運漫黃下游皆成巨浸前河臣嵇曾筠奏請建竹
絡壩工長六百餘丈補修堰工三百五十丈下接鄒
宿沭河民堰以資捍衛臣高斌於乾隆元年詳加履
勘壩工坐當迎溜地尙卑窪恐難捍禦奏請加修裏
戣石工每歲於汛水將發前卽派撥南河目兵住宿
防守按期探報水勢現在謹守成規小心防衛十
字河竹絡壩宿遷運河之十字河竹絡壩係康熙
二十八年挑浚中河告成堵閉支河口之後因駱馬
湖水直刷黃河北岸隄工經王新命請建竹絡石壩
一道以備湖黃溢漲三十五年前河臣董安國因黃
水盛漲將壩衝卸題請堵築未竣三十九年張鵬翮
復請堵築以禦黃流因旋閉旋衝亦未竣事四十二
年恭逢

聖祖仁皇帝南巡指示竹絡壩口門宜留欽此欽遵口
門北通湖南通黃運河橫亘其間形如十字因名十

字河迨雍正初年黃河形勢變遷大溜北徙刷去外灘直逼竹絡壩口門灌入十字河淤墊駱馬湖經齊蘇勒於竹絡壩口門外建築箝口壩並汰黃隄以挑黃溜將十字河北口堵閉另於迤上之王家溝建造五孔石閘以備宣洩湖水俾黃河不致灌湖惟黃河由竹絡壩入運勢甚湍激妨於運道臣高斌於乾隆六年將調任永定河工之時荷蒙

聖訓命將竹絡壩應行辦理之時議奏臣查現在情形黃水入運勢甚則衝嚙隄岸溜緩則淤墊運河而下游鹽河亦受其患且黃河勢漸北徙與運河僅隔一灘亦應預爲防範請將竹絡壩堵閉使黃水匯歸得

以并力刷沙而運河又可專受上源之清水惟是黃水患盛清水患弱又不得不權宜啟閉於一時以爲補救之計若遇各省重運經臨適值清弱則暫啟此壩引黃助清用以濟運若遇黃盛宿遷以下工程險要亦暫啟此壩以洩黃漲更遇清強黃弱之時又得藉以洩清以固下游中河一帶工程相濟爲用庶與聖祖仁皇帝諭旨相符至蓄洩啟閉之宜惟在臨時相機辦理 駱馬湖 駱馬湖在宿遷西北境環繞一百五十餘里上承東省蒙沂白諸河之水匯爲巨浸一由湖之尾閘洩入六塘河經宿桃安清海五州縣入海一由運河北隄入中河至楊家莊匯黃入海查

駱馬湖入中河之處舊卽十字河口門與竹絡壩通黃口門正對黃水盛漲直趨灌湖日漸淤墊雍正五年齊蘇勒將通湖口門堵閉另於王家溝建五孔石閘分洩湖水入運濟漕因閘底較高不能暢流經臣高斌將石底起深以資宣洩復於乾隆十三年在王家溝迤下柳園頭建三孔深底石閘設板啟閉內挑通湖引河一道長一千餘丈引導湖水濟運臣等謹按中河重運經臨須藉湖水接濟當預爲收蓄是以冬春慮其不足宿遷等縣民田當駱馬湖下流經由入海之地一經泛漲每至淹浸是以夏秋慮其有餘臣等每年於霜降水平之時將尾閘正引河甯家河

等處一律堵築瀦蓄湖水不使外出來春漕艘盛行中河水弱將三孔閘啟放並於王家溝分洩以濟漕運不足至夏間糧船過完二麥收穫將尾閘啟放由六塘河下注又恐六塘容受不能過多將正引河甯家河等處相機酌放不令全啟使之循序而進其通運之三孔閘王家溝仍照舊啟放使由中河分洩是駱馬湖冬春水小則宜堵壩蓄瀦以資濟運夏秋水大則宜相機啟放使無泛溢 劉老澗石壩王營減壩 謹查康熙三十九年張鵬翮請於桃源運河北岸劉老澗地方建九孔石壩一座以洩運水由六塘河經海州安東之碩項湖串入運鹽河歸海嗣因黃

水入運勢盛每一啟放散漫停淤兼之六塘河爲駱馬湖下委每遇伏秋水勢浩瀚若再添入劉老澗減洩之水難以容納臣高斌於乾隆十一年奏請將劉老澗壩堵閉無庸常放又王營減壩係康熙四十五年張鵬翮奏請建造以分洩黃水由運鹽河入海但鹽河地窄即使啟放所洩不多不能減黃而黃水挾沙灌入反將鹽河淤墊臣高斌於乾隆十一年奏請將鹽河減壩照乾隆八年原議必俟黃水異漲始行啟放伏查近年黃水不入中河河道日漸刷深暢流下注更無藉劉老澗石壩以資分洩至王營減壩旣無分洩實濟又慮淤墊鹽河並使六塘河洩水不暢

均無裨益以上兩處石壩應請照舊堵閉非遇異漲無庸啟放 鹽河 鹽河係康熙二十六年前河臣靳輔題請挑濬由清河歷山陽之朱元莊安東之平旺河達袁家河至海州之新安鎮武障河入潮河歸海其臨運口門舊在清河西康熙四十二年改運口於楊莊遂移鹽河口門於楊莊迤上之花家莊建造石閘以資啟閉雍正九年因溜下移形勢不順將石壩堵閉改建草壩爲淮北各場鹽艘運行並葦蕩左營暨各廳運料要道其所經清河山陽安東海州各邑民田藉以灌溉民間柴米船隻藉以通行而中河漲水亦於此分洩每年冬春中河水小則將鹽河口

門草壩堵閉以蓄水濟漕夏秋糧艘過後則將草壩
啟放運送鹽柴船隻但河身逼窄河道又紆曲綿長
從前宿遷竹絡壩口門通入黃水挾帶泥沙與王營
減壩洩入鹽河淤阻鹽運今竹絡壩與王營兩壩既
皆節宣有制則黃水不入自無沙淤之患現在水利
案內復於鹽河以下之武障河項家沖牛墩河六里
河義澤河等處各建滾水石壩使水勢蓄洩有度惟
在口門草壩啟閉合宜則運道民生與鹽運工料均
資利益 楊家莊運口 楊家莊運口康熙四十二
年欽奉

聖祖仁皇帝指示改挑以利漕運先是中河運道由清

河之上仲莊閘出口形勢未順逼溜南趨切近黃淮
交會之區有助黃灌清之患恭逢

聖祖仁皇帝於四十二年春巡視南河指授善後之計
命於陶莊迤下之楊家莊改挑運口與仲莊閘相距
十餘里在清黃交會之下游黃流平緩情形頓異時
張鵬翮遵奉

諭旨於清河運河之雙金門閘挑河長二千三百八丈
兩岸創建隄工因雙金門閘磯心窄狹難以行運盡
行拆去另建草壩裹護又建草壩二座均爲鉗束河
流之用嗣因中河水暢無需石閘啟閉惟添建三草
壩足資收蓄使清水不致驟洩又得遞加約束鼓力

禦黃此皆仰蒙

聖祖仁皇帝聖謨獨斷指示楊家莊運口得地勢之宜
既避越清口不致助黃灌清而中河發源東省千里
長流順軌東注永無倒灌之患迄今五十年利賴無
窮 清口運口 洪澤湖匯豫省七十二山溪之水
出清口會黃以注海爲黃淮之要津全河之關鍵藉
力於東西兩壩以定機宜先是運口與清口切近直
對濁流易於倒灌運道屢更迨後數經更移未得其
地臣於乾隆二年恭請

聖訓移於舊運口迤上七十餘丈與三汊河相接得以
避黃納清第運口分灌入運爲淮揚三百里之咽喉

以通漕運惟量分湖水足以濟運而止無庸過多前
明曾建五閘以爲收蓄因年久傾廢嗣後復修天妃
越河石閘各一座不足以資節束每湖水長發下游
有吸川之形上游有建瓴之勢空重漕船過閘危險
而高寶一帶每致溢岸盈隄臣高斌於大挑運河案
內奏請運口內建草壩三座惠濟正越兩閘下酌建
正石閘二座越河石閘二座又於二閘尾各建草壩
重重關鎖視水大小輪換啟閉庶水平溜緩操縱由
人臣高斌又於乾隆十一年奏請運口頭二三壩口
門俱收窄以四丈爲度俾源頭進水有節則下游無
虞盈溢近年淮揚兩郡河水安瀾現今重運經臨正

值汛水長發而惠濟各閘水勢平緩糧艘過閘便易不復危險 高寶各壩下河 高寶兩境運河東隄建築閘壩共十四處皆洩湖河漲水由鹽城興化阜寧泰州入海其來源本於洪湖每伏秋湖漲由運口歷清江淮安下注高寶城郭隄工俱當其衝不得不多爲分減前張鵬翮以啟壩慮害民田閉壩又傷隄岸遂將過水最多之五里車邏南關三減壩改爲石滾壩非值有餘不令過洩以冀兩全後經區畫而下河一帶難免淹浸是計其流而未究其源也臣高斌仰遵

聖訓籌畫來源於乾隆四年奏請洪澤湖之天然壩無

庸輕啟祇留三滾壩以資減洩又於大挑運河案內奏請於運口內建設閘壩既節洪湖之水使暢出清口禦黃又保高寶下流無泛溢之患查高寶閘壩口門俱寬四五六尺不等節宣有制惟五里車邏南關等壩俱各寬六十餘丈洩水太多今來源既減則此三壩毋庸輕放其五里等壩俱用柴草堵築設遇洪湖異漲三滾壩洩水過多請酌量將南關車邏二壩啟放以減水勢其五里中壩地勢卑下洩水過大一經啟放則下河不能容受應請常行堵閉經臣高斌奏明現在遵照而下河各支河又於水利案內蒙皇上發帑挑浚深通上減來源下通去路從前被災各

邑得免淪胥無不仰戴

皇仁 芒稻河歸江各路閘壩 高寶諸湖之水歸入
運河邵伯以上向從高郵車邏南關五里各壩分注
下河入海邵伯以下向從金灣三閘及鳳凰壁虎橋
灣頭閘各路分注由芒稻河入江查運河入江較入
海之路近捷而運河水高於江通流順勢消退亦速
若從興鹽等縣入海路遠港多且興鹽一帶形如釜
底運河下水稍大先淹內地然後歸海是入海不如
入江之便形勢顯然康熙三十八年奉
聖祖仁皇帝諭旨將湖水俱由芒稻河人字河引出歸
江如有淺處俱令挑深仰見

聖謨廣遠洞悉機宜乾隆七年臣高斌面奉

皇上聖訓將邵伯以下入江之路酌量加增臣高斌遵
奉

諭旨詳勘會奏於金灣滾壩之下東西灣地方添建滾
水壩二座並挑引河復將仙女廟金灣對過之越河
及通江之石羊溝董家溝俱行增挑其原有金灣壩
下並鳳凰橋引河及通江之廖家溝秦家港白塔河
百汊港各河道則大加疏浚並於各河頭分別建立
閘壩每年視水大小相機啟閉臣等謹按運河入江
之路本爲便捷今河道又經加增則高寶湖水足資
分洩其邵伯迤上高郵各壩非遇異漲泛溢無庸輕

啟現在遵守辦理高寶運河東隄以下與興鹽泰阜民田俱得豐收而湖河入江分洩利便並無阻滯之

虞

南河
成案

十一月三十日浙江道監察御史胡蛟齡奏江南徐州府屬邳宿諸州縣海州所屬之贛沐諸縣皆係河淮下流而海州上承東省來源下又逼鄰海浦每春夏之交栽植甫畢橫流隨至泛濫阡陌民種無收應輸正賦不能常年請豁停緩終須帶徵民困已極近蒙

恩旨疊次蠲除并令督撫河臣會同查勘設法疏通而水患終不能免竊思淮徐土著之民既不可遷徙遠

適又不能力與水爭田廬室宇動遭淹沒將何底止謹按明人治河議云宜於濱河處所做江南圩田之法多爲溝洫使足容水臣愚以爲此議難行於北似可通用於南今臣訪聞徽民寄居海州者每置買田畝周圍築隄捍水隄內多爲溝洫隄間安設斗門相時蓄洩一如圩田之制無論旱澇歲獲有收此卽成效已經顯著又乾隆十一年八月高斌會同尹繼善等議將海州一屬令地方有司勸諭居民修築圩隄其鄰接海屬之宿遷桃源清河安東阜寧等縣照依辦理以期共收實效今數年以來作何辦理實在情形無從知悉伏乞

敕下督撫諸臣查照前議嚴飭地方有司勿以粉飾邀名勿以畏難中止勿以未經查覈恐干失察通同隱匿致隳已就之緒仍遴委大員帶領諳練農民經理并將作何督率推行堪於數年內續成大工之處確切定議奏請

裁決庶淮北百萬窮黎幸獲更生矣奉

旨著高斌黃廷桂會議具奏

南河成案